



# Tir Yimiyim

www.tiriyimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiriyimiyim@gmail.com

TAPAK 8

Yangia anidakangma :

f Tir Yimiyim


Instagram tiriyimiyim@aolima

YouTube tir yimiyim

TAPAK 7



Liverpool-i Mac Allister  
£55m agi alizükogo



Mike Pence-i 2024 US tir election  
atema nübuyim tenzükogo

VOL. XX NO. 237 (ADOK 237) DIMAPUR ROGONÜ (FRIDAY)

AAMI (JUNE) 09 2023

₹ 5.00

## RD nung sen crore 74 meshidaki amshi: NTPRADA

**Dimapur, Aami/June 08 (TYO):** Government of India indang Pradhan Mantri Awas Yojana (PMAY-G) Scheme ya 2022 tashi nung ajak nem talitsü ki yanglutsü atema lir, saka Nagaland Rural Development (RD) Directorate kübok Project Directors 11 ajanga khenyongi meshidak amshia aru ta Nagaland Transparency' Public Rights Advocacy and Direct Action Organisation (NTPRADA) ajanga June 8, 2023 nü sangdong ka nung ashi.

Nüburtem asoshi iba ken o ya tekeraba nung tatem kati arutsü asoshi RTI Activist John Naga-i NTPRADA dang asüngdanga liasü.

John Naga-i Department of Rural Development dang nungi osang meshia liasü aser department-ia "PMAY-G kübok sen shinga nema magütsü" ta jangja-jangja ashi.

Ajisüaka, RTI ajanga langzüba nungbo Ministry Sanction order aser drawal authority ajanga Finance Department nungi Nagaland nung aliba district 11 awajema beneficiary 21,748 atema PMAY-G Units yanglutsü asoshi sen 74,73,07,700/- (Seventy four

## Manipur tensa junga lir, Centre-i sen crore 101 agütsütsü melaogo

**Imphal, Aami/June 08 (Agencies):** Union Home Minister Amit Shah-i totuyuba agütsüba sülen mepetmesü adoka aliba Manipur nung tesem balala nung prokshia aliba nüburtem yaritsü asoshi Centre-i sen crore 101.75 relief package agütsütsü molungogo, ta Security Advisor to the state government, Kuldiep Singh-i Brehostibarnü ashi.

Manipur nung tensa junga aser azüoka lir aser tesüiba ghonda 48 tsünga azüdokshiba meliasü, ta pai ashi.

"Manipur nung azüdokshi lendong timtem mechi tesem balala nung prokshia alir nem teyari agütsütsü atema Ministry of Home Affairs ajanga sen crore 101.75 relief package agütsütsü agizükogo. Union Home Minister Amit Shah-i tawa Manipur semdangba mapang

crores seventy three lakhs and seven thousand seven hundred) agizükba shia lir, ta NTPRADA sangdong ajanga ashi.

Ibai RD department nung kanga ochi mashi inyakba mapa ka lir, aser iba sen agir beneficiary 21,748 ya meshimetsür kümdaktsüba mapa ka lir, ta kasa sangdong ajanga metetdaksü.

Iba ama nüburtem ashiokja mapa inyakba mapatem ya taoba aser tang teinyakdak RD Directortemi tejangja shitetsüla ta NTPRADA ajanga metetdaksü.

Senotsü ashikülak mapa inyaka agiba indang ochi kaktetsü aser taoba ketdangsurtem pua parnok nem parnoki auyar aliba sen tanaben menokdaksütsü aser Court nung tapet ken o benoktsü atema Chief Minister dang tekeraba nung 'Special Investigation Team' (SIT) ka tentetsü akhanger, ta NTPRADA ajangasa metetdaksü.

Anogo 15 tsünga iba mera ya magira, NTPRADA ajanga taoba aser tang teinyakdak RD Director tem anema mera agitsü ta Nagaland Transparency' Public Rights Advocacy and Direct Action Organisation ajangasa ashi.

## Küm 10 inyakyim nung ajemdaker Govt. schools upgrade asütsü: Advisor Yhome

**Kohima, Aami/June 08 (TYO):** Tesüiba küm ter tsünga school inyakyim report nung ajemdaker government schools tem upgrade asütsü, ta Advisor, School Education & SCERT, Kekhriehoulie Yhome-i Brehostibarnü ashi.

Administrative Training Institute, Kohima nung Nagaland Education Mission Society, Samagra Shiksha Nagaland (SSN) ajanga District Mission Authorities (DMAs) aser Educational Block Research Centres (EBRCs) tem den ananü atema state level coordination senden ka ayongzükba nung Yhome-i iba olen ya shia liasü.

Education department ajanga state nung aliba government school 1939 nungi tesüiba küm ter indang data bendenba mapang lir, ta pai metetdaksü.

Pei constituency nung aliba school tem upgrade asütsü atema politician temi lenmang bushir, aser ibaji tesüiba küm 10 inyakyim nung ajemdaker inyaktsü, ta pai alaketa ashi.

"Ni education sector nung politician tem nem khenyongi shilem magidaksüner," ta pai ashi.

"Tapok aliba 'bucket' ka süngdaksütsüji nungdak maka, anungji tesüiba küm ter tsünga inyakyim nung ajemdaker school tem upgrade asütsü," ta Yhome-i ashi, shiba yimtenren nung tetsüng majemokdang nungi educationist liasü.

Junga inyaksangshi masüba school tem nem tajungba kuma renoktsü asoshi küm asem tali agütsütsü aser iba mapang temelenshi melira shibangtsüsa akumts, ta pai metetdaksü.

Ajisüaka pai tesayur aser department ketdangsurtem dang

akok tashi tajungtiba agi inyaktsü ajungshi aser "asenok külemi aintsüla," ta ashi.

School maneni lapoktsü mesüra shibangtsü atema Trainers of Teachers (ToTs) aser EBRC coordinators nungi shisa agitsü, ta pai ashi.

Yimtsüng putu menden aser kaketshir tentet nem arishi küm 2 nungi 9 tashi kaketshirtem nütsüngsük bendendaktsütsü, kechiaser yamaji inyakba ajanga parnok education system nung anioktsü, ta Advisor Yhome-i ashi.

Tesayur temi tanurtem dang lesson sayuba jangjatetsüla, kechiaser tesayur aika political tsütsü tesendaktep mali tesem tezülen bendanga agütsür tajungtiba agi sayur, saka political tesendaktep alir aika Dimapur aser Kohima nung dang liner, ta pai ashi.

Tesayurtem tesem ajak nung kasa tenzüksü asoshi jembidang, Nagaland nung government tesayur 19,000 shi lir aser ajak külemi inyaktsü nungdaker aser government school tem ajungketsü asoshi ajaki tajungtiba nung tenzüksüla, ta ashi.

Taküm government school tem indang result kanga tajungba liasü aser Higher Secondary School tem nung azüngtsü nungteper, aser ibai school ki mejungi liaka government school nung tesayur tajungba aliba ajanga lir, ta pai pelaba lemsatepa liasü.

Ajisüaka government school tem nung class takdang ajema aliba mechi HSLC nung takok angur ajak nem admission magütsüteter, ta pa jashiba lemsatep.

"Anungji Higher Secondary School temi tajungba inyaktedang kechiba high school tem tesüleni atsüngzükba

aor, qualified teacher tem lir aser asenoki itemji lepa reprangshitsü nungdaker," ta Advisor, School Education ajanga ashi.

Tang aliba sorkar nung School Education indang Advisor tasenbai ashiba agi, nüburtemi ajungshiba mechi transfer aser posting nung politician temi teka tali sangshiba ngua tezü atanger.

School Education directorate-i i tang tashi par kübok graduate aser primary tesayur kwi aliar memetet, aser ibaji July 31 tashinung jangjatetsü asoshi maparen tenzükogo, ta pai sasasetta ashi.

"Nagaland Education Administrative Services tekeraba nung tenzüksü asoshi maparen inyaktar, anungji education department nung alir ajaki tashi angateptsü ayongzükter," ta pai ashi.

Department ajanga tekeraba nung service rules tasen ka yanglutsü, kechiaser 2017 Service Rules ya jangratemtsü maket aser metokmeperi aika lir, ta pai ashi.

School Education aser NBSE, SCERT aser Samagra Shiksha ama adianu tentet temi training sentong jenti ayongzükba agütsür, anungji mesüktepa mayongzüksü atema arok calendar ka yanglutsü, ta Advisor Yhome-i metetdaksü.

Directorate of School Education tali tashi itshitsü indang jembidang, asenok team ka ama külemi inyaktsü nungdaker, ta pai ashi.

State nung education system tajungba kuma melenshitsü atema classroom nung ajangshibatem department nung temaba jenjang tongtsü nung ajungtsü, ta pai ashi.

## DMAs aser EBRCs atema ananü state level coordination senden tenzükogo

**Kohima, Aami/June 08 (TYO):** Nagaland Education Mission Society, Samagra Shiksha Nagaland (SSN) ajanga Administrative Training Institute, Kohima nung District Mission Authorities (DMAs) aser Educational Block Research Centres (EBRCs) tem den ananü atema state level coordination senden ka Brehostibarnü nungi tenzükba mapang, Nagaland nung 2020-21 aser 2021-22 nung school education temelenshi tsütsü elementary aser secondary level nung terenlok lir aser iba yongi school züngtur anener ajema kumogo, ta Commissioner & Secretary, Kevileno Angami-i ashi.

Ibai DMAs aser EBRCs temi classroom nung maparen balala inyakba ajanga lir, ta lai ashi.

Parnok nem tenüngsang agütsüba mapang, blocks aser school nung inyakyim balala mapa kuma amshiba mapang tayongzükba aser timtem aika ajurur, ta lai ashi.

National Education Policy 2020 kübok temelenshi balala aliba yimya kuma amshitsü nungdakba indang jembidang, NEP 2020 mapa kuma amshiba nung department ajanga blocks aser schools tem nung mapa kuma amshitsü asoshi state nem inyakyim balala nunglokja lir, ta lai ashi.

Sentong yanglur temi kanga junga asadanga research agiba sülen NEP 2020 kübok inyakyim balala benok aser item inyakyim ya karbo academic atema mesüaka tanurtemi nungdakba nung yariser aser ibaji ajanga parnok sempet tali tajungba nung moluteter aser state nung tarutsü lenir ama aroka shisadanger, ta Kevileno Angami-i ashi.

Iba atema DMAs, EBRC coordinators aser ToTs tem tongti shilem lir aser school nung item inyakyim tajangzük lia inyaktsü asoshi nenoki kanga junga shisadangtsüla, ta lai ashi.

Lai parnok dang kanga junga inyaktedang kechiba high school tem tesüleni atsüngzükba

lira terenlok asoshi mera balala agitsü ajungshia liasü.

"Aseni inyakba ajanga tanur dak kongshitsü, anungji school nung tanurtem dak tajung agi kongshitsüsa temolung agütsütsüla," ta lai ayongzük.

Kasa sentong nung Mission Director, Samagra Shiksha Nagaland (SSN), Tamsunaro Aier-i ashiba agi, NEP 2020 benokba sülen SSN ajanga mission mode nung inyakyim aika benoka inyaker.

"NEP 2020 mapa kuma inyaktsü asoshi asenok skills alitsü kanga nungdaker. Asenoki tematiba jenjang nung bendanga agütsütsüla aser akok tashi tekeratiba nung timtem bentetsü temolungtetba alitsüla, kechiaser NEP kübok mapa ajak mapang telatet lir," ta lai ashi.

Education sector nung yimya tasen aser tayongzükba balala ajangshiba meteta NEP 2020 den apet asenok ajaki yimya tasen asatetsüla, ta ashi.

(Maneni tapak 2 nung...)

# CL John-i Terogvunyu yimtsüng süngküm semzüksü



Minister, CL John-i, June 7 nü Terogvunyu yimtsüng süngküm semzüksüba sentong nung tangokba noksa angur.

**Dimapur, Aami/June 8 (TYO):** Minister for Environment, Forest & Climate Change and Village Guards, CL John-i, June 7 nü Terogvunyu yimtsüng süngküm semzüksüsügo.

Yimtsüng süngküm ya Japan International Cooperation Agency (JICA)-i teyari agüja Nagaland Forest Management Project-i Entry Point Activity kübok senotsü teyari agüja yangluogo.

Sentong nung o jembiba mapang Minister-i, yimtsüng süngküm yanglutsü atema yimdaklirtemi senotsü lalushipong mesüi amshiba atema kanga pelaba lemsatapa liasü. Minister-isa, yimdaklirtem dang terenlok balala atema

department den teka amteper inyaksü ajungshi liasü. Tseminyu district ya tanga district tem terenlok asoshi kishi ka, kechiyong parnok tongtibang tesem ka nung amenoka lir ta shia minister-i, yimdaklirtem dang maneni mapa tajung inyaksü aser tangar asoshi tatishitsü tajung ka akümtsü ayongzüka liasü.

Sentong nung o tatsüka jembiba mapang Temjenyabang, IFS, Project Director (A, F & P), NFMP-i, yimdaklirtem aser talisa Joint Forest Management Committee dang NFMP kübok mapa balala takok ngua benoka inyakba atema tenüngsang agüja liasü. Paisa,

tarutsü nung project tem ya tang mapa koda inyaker iba dak keta lir ta shia, yimdaklirtem dang project takok asoshi bendanga agüja inyaksü ajungshi.

Sentong nung Daniel Tep, Village Council Chairman-i lokti pela agizükba o jembiba. Süngküm sümzüksüba sentong nung Zuthunglo Patton, IFS, Conservator of Forests (STC), Nagaland, Rajkumar M. IFS, DFO & DMU Head Kohima, Dr. Sevono Seletsu, ACF & ADMU Head, Yhuntilo Kent, FMU Head Tseminyu, Field Staff, DMU Support Staff aser kidanger yimtsüngtem nungi lenirtemi shilem agia liasü.

# Wokha nung "first 1000 days programme" tenzükogo

**Dimapur, Aami/June 8 (TYO):** Wokha nung "first 1000 days programme" amenokba sentong Jun 8 nü Dr. Motsuo Memorial District Hospital conference hall nung agiogo. Iba sentong nung Deputy Commissioner, Wokha Ajit Kumar Ranjan, IAS alaketa jaoker liasü.

Sentong nung o jembiba mapang DC Wokha-i, iba sentong tenzükba nükjidongji lokti aser yimtsüngtem nem tanur ka asoshi mezüngbuba anogo 1000 ya koda tongtibang indang indang metedaktsüsü asoshi lir ta ashi. Iba mapang ya tanurtem tarutsü yanglutsüsü atema mapang aser maongka tajung ka lir, ta pai ashi.

Paisa, department

kedangsür (H&FW) ajak dang iba osang grassroots jenjang nungi metedakja, nükjidong tongtetsü atema lokti tentet balala den teka amteper inyaksü ajungshia liasü.

Sentong nungsa Dr. Thungchanpeni Patton, DPO (RCH/UIP)-i, mezüngbuba anogo 1000 koda tongtibang iba indang jembiba mapang, tanur ka optimum, health growth, cognitive, aser neurodevelopment ya iba anogo 1000 tsüngda ataloker ta ashi. Laisa, mezüngbuba anogo 1000 mapang tinyaksü balala aser sorkar scheme balala indang metedakja liasü.

Sentong nung shisalen sayur Dr. Benchumi Obs & Gynae, Dr. Obed Sumi, Samuel DPM,

NSRLM-RD, Echungbeni Tsanglao, aser Dr. Thungchanpeni Patton nungeri Antenatal Care & Hospital Delivery, PMVVY schemes, aser mezüngbuba anogo 1000 tsüngda nutritional support, Breastfeeding-the Complete Nutrient & Early Childhood Development, tanur nem vaccine agütsüsü koda tongtibang, SBCC through SHG institutions aser convergence at Village Health Sanitation aser Nutrition days indang onük nung ajemdaker jembiba liasü.

Iba sentong ya Dr. Asero Rhetso DPO (NCD) lenisüba nung agi, Dr. Zuben Kikon-i lokti pela agizükba o jembiba aser Mhonbeni Ezung, DPM-i tepela o jembiba liasü.



Changtongya Town nung 'Janbhagidar/people's participation for better outcomes' sentong ka Bridges Academy Changtongya Town nung agia liasü, kong tetushi tesemdang ka ama C.Wangan (NCS) SDO (C) Changtongya Town dena liasü. Iba sentong nung Head Master ajanga G20 indang lemsatap aser tetushi tesemdangeri nüburtem dang süngdong atemtsü ayongzüka liasü. Iba sentong nung 'One Earth, One Family, One Future' omen nung ajemdaker drawing yangluba tetoktepa agia liasü.

# NBSE-i tetushi agütsüba sentong indang metedaktsü

**Dimapur, Aami/June 8 (TYO):** Nagaland Board of School Education-i sangdong ka ajanga, Toppers/Rank Holders, subject balala nung temaba jenjang angurtem, HSLC and HSSLC Examinations 2023 kübok Governor's Awards Awardees tem aliba institution tekolaktem dang Angh-i tetushi agütsüba sentong June 14 nü 11:00 ako nungi tenzükba Dr. ImkonglibaAo Hall, Raj Bhavan, Kohima nung agütsü ta metedaktsüogo.

Toppers, Rank Holders, Governor's Awards Achievers tem ajak iba sentong nung shilem agütsü jaokogo. Toppers/Rank Holders aliba institution tekolaktema iba sentong nung adentsü jaokogo. Sentong agütsü aliba

takdang mesadamba ajanga takümba iba sentong nung shilem agütsü atema tsürapurtem mejaok.

Iba dak sendakba nung institution tekolaktem dang, Toppers, Rank Holders aser Achievers shirnok pei school nungi pass süogo, parnok nem iba sentong nung shilem agütsü atema osang agütsüsü metedaktsüogo.

School nungi confirmed lists ya June 9 nü 3:00 ako tashi nungbo nagaboard@gmail.com dangi mail asütsüla aser iba sülen Governor's Secretariat nem agütsüsü.

Tejaokertem ajak sentong agütsüba tesem 10:30 ako nungbo tonga arutsüla aser 10:45 tashi nungbo menseper alitsüla. Kaketshirtem pei school uniform semer arutsü metedaktsüogo.

# Raj Bhavan-i ketdangsürtem nem mapa lemsüksü

**Dimapur, Aami/June 8 (TYO):** October 26, 2022 nü Secretariat shiti dak ajemdaker Nagaland Angh-i, Governor's Secretariat, Raj Bhavan, Kohima dak sendakba nung Right to Information Act, 2005 agüja aliba ketdangsürtem Appellate Authority, Public Information Officer (PIO) aser Assistant Public Information

Officer (APIO) ama shimba metedaktsüogo.

Ketdangsürtem yamai alitsü:- Rajesh Soundararajan, IAS, Secretary to Governor-Appellate Authority; Dzialekuolie Kire, Deputy Secretary- Public Information Officer (PIO)andJochule, Section Officer- Assistant Public Information Officer (APIO).



Purana Bazar, Dimapur nung Golden Cargo Dimapur June 5 nü M Yanger Ozukum, Pastor, Old Showuba Ao Baptist Fellowship-i bendanga agüja lapoktsüogo. Golden Cargo Dimapur, Proprietor, Sashikala-i shishilembar tem dang saru balala meshiba indang tebilemstü süoki ia bilemba lemsatapa liasü. Shishilembar tem timtemba angatetsü mepeshiba mapang laisa, establishment melapokdang nungi telok balalai saru meshiba indang lemsatapa liasü.

# DMAs aser EBRCs atema... (TAPAK 1 NUNGI...)

School sasep nung shisaliok tajung agütsüsü atema NEP 2020 küm EBRCs shilem tulu kumogo aser tanen makai inyaksüla, ta Tamsunaro Aier-i ashi.

EBRCs ya Child with Special Needs nung rangloker Nipun Bharat Mission den apet Teaching Learning Materials densema academic resources bendena aliba tesem ka ama alitsüla, ta Mission Director SSN ajanga ashi.

School züngtur anenba tanurtem jangjatetsü asoshi tali saksalemstüla, kechiaser iba nükjidong ya 2030 tashinung

tanur ajak mainstream school nung lidaktsüsüba lir, ta lai ashi. DMAs, EBRC aser ToTs tem dang pei ajung asaa meinyaki aser sodi nung anisüngzüka kazür ama mebilemi meranga inyaksü ayongzüka liasü.

Iba sentong nung Joint Mission Directors, SSN, Dr Kevizakie Rio aser Dr Bijano Murry nati Samagra Shiksha aser education sector nung micro improvement plans indang PowerPoint presentation agüja liasü.

Iba sentong nung menden SSN Deputy Mission Director, Kelhikha Kenye liasü.

# Linük aikati India ya terenlok partner ama züngshir: S Jaishankar



New Delhi, June 08, 2023: Modi-i aniba sorkar küm 9 ajungba nungtem nung Brihostibarnü New Delhi nung osangbenertem senden ka nung External Affairs Minister S Jaishankar aser Ministers of State- Meenakshi Lekhi aser V Muraleedharan nungeri jembidang tangokba noksa nung angur.

**New Delhi, June 08 (Agencies):** Centre nung Narendra Modi-i aniba sorkar küm teku ajungba amongba dak sendakba nung Brihostibarnü External Affairs Minister (EAM), S Jaishankar-i Ato kilonser Modi lenisüba nung India-i ajangzüktetbatem metetdaksü.

Osangbenertem senden ka nung jembidang Jaishankar-i, "Alima shilem tuluba kati joko India ya terenlok partner ka ama züngshir," ta metetdaksü.

"India-i rongsenkettzüng tsütsü kanga tongtibang süa inyaker, aser ibaji alimai meteta kümogo," ta paisa metetdaksü.

S Jaishankar-i, India-i Afghanistan nung aliba Indian Embassy-i technical team ka yokogo aser parnoki tensa mita asadanga India-i koba lenmang ajanga Afghanistan nunger yaritetsüar shisadangtsü, ta

metetdaksü. Jaishankar-i, tang India-i Afghanistan nung ranglokba ya yimtenren tsütsü masü saka Afghan nunger yaritsü atema lir, ta metetdaksü.

"Taliban teloki Kabul atsüngba sülen onoki India nunger ketdangsertem aser staff tem aniteta liasü, kechiyong security tsütsü tebilemtsü liasü; tanga linüktemia yamaji inyakogo. Tesülen onoki technical team ka Embassy dangi yokogo," ta pai metetdaksü.

Tang Afghanistan nung aliba sorkar dak sendakba nung India-Afghanistan tesendaktep jenjang koma asütsü?, ta asüngdangba langzüdang pai, "Iba linük nungji vaccine agi anünger, wheat agi anünger aser mozü agi meperir. Mapang süia aodang projects karbo timtemtsüa akok. Tang

Afghanistan nung ranglokba yimtenren tsütsülen nungibo tera dang. Iba ya talisa Afghanistan nungertem yaritsü atema lir; akhidang nungi asenok parnok den tesendaktep lir. Tang tensaji yamaji lir," ta metetdaksü.

Yaküm December ita nung Parliament nung jembidang Union Minister of State for External Affairs, V Muraleedharan-i, India-i Afghanistan den senteper terenlok projects 500 dak tema inyakdar, ta metetdakja liasü.

Afghanistan kübok province 34 nung India-i Afghanistan den partneship nung terenlok projects 500 dak tema inyakdar, aser item projects ji teimbaka power, tzi supply, gari lenmang connectivity, healthcare, shisaliok, aluyimba aser capacity building den sendaktepa lir.

# Cyclonic yipru 'Biparjoy' maneni tesashiba akümstsü: IMD

**New Delhi, Aami/June 08 (Agencies):** 'Biparjoy' ta ajaba cyclonic yipru ano maneni tesashiba akümstsü aser north-northwest tsütsüleni aontsü, ta Brihostibarnü India Meteorological Department (IMD)-i metetdaksü.

IMD-i sangdong ka ajanga, "VSCS BIPARJOY tang east-central Arabian Sea nung lir, June 8 anepdang 05:30 ako nung Goa nungi kilometer 860 aser Mumbai nungi kilometer

910 shi pilar lat 13.9N & long 66.0E anasa liasü. Iba yipru ano tesashiba akümstsü aser north-northwest tsütsüleni aontsü," ta metetdaksü.

Tamalen IMD-i, iba cyclone ya taruba ghonda 48 tsüngda ano tesashiba akümstsü aser taruba anogo asem tsüngda north-northwest tsütsüleni aontsü, ta metetdakja liasü.

IMD-i twitter ajanga, "VSCS BIPARJOY tang east-

central Arabian Sea nung lir, June 7 aonung 11:30 ako meta Goa nungi kilometer 870 aser Mumbai nungi kilometer 930 shi pilar lat 13.6N & long 66.0E anasa lir," ta metetdakja liasü.

IMD-isa anogopurtem dang Arabian Sea nung cyclone-i kongshiba tesemtemi angopui maotsü tekümdangtsü metetdaksüba den külemi tziyimi oa alir angopurtem danga tziyim nungi meyipa arutsü metetdaksüogo.



June 08, 2023 nü New Delhi nung Guru Gobind Singh Indraprastha University (GGSIU) indang campus tasenba semzükba sentong nungDelhi Lt Governor Vinai Kumar Saxena, Delhi Chief Minister Arvind Kejriwal, Delhi Assembly Speaker Ram Niwas Goel aser BJP MP Gautam Gambhir nunger tangokba noksa nung angur.

# LS menden 450 nungbo opposition candidate kakati dang tokteptsü

**New Delhi, June 08 (Agencies):** 2024 küm Lok Sabha election nung BJP anema opposition party tem longjem tokteptsü nükjidong nung Bihar Chief Minister, Nitish Kumar-i June 23 nü state yimtiba, Patna nung senden tuluka ayongzüka lir.

Opposition telongjem atema party tashi itshitsü nükjidong nung JD(U) lenir, Nitish Kumar-i party lenir K C Tyagi special adviser aser tongti otongdar shimogo.

Patna nung ayongzüka senden nungji Congress lenir Rahul Gandhi, Delhi Chief Minister Arvind Kejriwal, West Bengal Chief Minister Mamata Banerjee aser Congress Tir Mallikarjun Kharge nunger densema opposition party balala nungi lenirtem aika adentsü.

Kasa senden nungji Samajwadi Party Tir Akhilesh Yadav, Jharkhand Chief Minister Hemant Soren, taoba mapang Maharashtra nung Chief Minister Uddhav Thackeray, NCP Tir Sharad Pawar, Tamil Nadu Chief Minister MK Stalin, CPI General Secretary D Raja aser JDU Tir Lalan Singh nungera adentsü jangaogo.

Amongnü All India United

Democratic Front (AIUDF)-ia 2024 general elections atema BJP anema opposition longjemba nungji adentsü, ta sangdongogo.

Osang angazükba agi, taruba Lok Sabha election nung menden 450 nungbo opposition party temi longjem menden shia candidate kaka dang toktepdaksütsü atema jembidar.

Tetezü, regional party tem tashi itta aliba state tem nung BJP candidates den toktepdaksütsü atema regional party nungi candidates shimtsü aser Congress sorkar aliba state tem nung Congress candidates shimtsü. Trinamool Congress tongti aser West Bengal chief minister Mamata Banerjee-i 2021 küm assembly nung takok anguba sülen lai mezüing iba formula benoka liasü.

Opposition party tem longjemtsü nükjidong nung Nitish Kumar-i lenirtem aika ajuruogo. Mamata Banerjee-i opposition senden ya Patna nung ayongzüksü benoka liasü.

Opposition party tem telongjem senden Patna nung ayongzüka ya party aika atema, talisa anüdoklen aliba state tem atema kanga tetemsü tesem ka lir.



June 08, 2023 nü Belgrade, Serbia nung India Tir, Droupadi Murmu-i Mahatma Gandhi kürakyanglu matsüngdang Gandhi nem akhüm agütsüba noksa nung angur.

# Kerala CM Pinarayi leniba nung telok kati US aser Cuba semdangtsü

**New Delhi, June 08 (Agencies):** Brihostibarnü Kerala Chief Minister, Pinarayi Vijayan leniba nung state sorkar nungi telok kati US aser Cuba semdangtsü atema apusoa ogo.

Chief Minister den tangartemji Assembly Speaker A N Shamseer, State Finance Minister K N Balagopal na densema lir. Parnoki anogo 8 tashi US aser Cuba semdangba mapang nung American Regional Conference of Loka Kerala Sabha densema sentong aika nung adentsü.

Loka Kerala Sabha (Non-resident Keralites convention) ya June 9 nungi tenzüka anogo asemnü New York nung ayongzüka agitsü.

Vijayan June 14 tashi US nung alitsü aser kasa anogo nungji Cuba yimtiba, Havana-i aotsü, ta Chief Minister's Office (CMO) sangdong ajanga metetdaksü.

US nung Kerala CM-i American Regional Conference of Loka Kerala Sabha

tenzüksütsü; iba jakdang June 9 nü Vijayan-i New York nung aliba 9/11 Memorial semdangtsü.

June 11 nü chief minister-i Business Investment Meet tenzüksütsü. US semdangba mapang nung Vijayan-i America nung Kerala nunger investors, IT tsütsü mongintem, kaketshiterem aser tetsür entrepreneurs ajurutsü.

Vijayan-isa New York nung aliba Times Square nung yangji aliba Kerala nungertem den jembitsü. June 12 nü Washington DC nung pai World Bank's South Asia Regional Vice-President Martin Reiser ajurutsü aser June 13 nü Maryland waste management systems semdangtsü.

June 15-16 anogotem nung Havana nung Vijayan-i sentong aika nung shilem agitsü, tongti ketdangsertem ajurutsü aser Jose Marti Memorial densema tongtibang tesem aika semdangtsü, ta CMO sangdong ajangasa metetdaksü.



## TIR YIMYIM YIMOBILEM (EDITORIAL)

DIMAPUR ROGONÜ, AAMI (JUNE) 09, 2023

### Longkak ait atar asü ?

**N**agaland nung ajak akoksatsüsa inyakba yimya tamajung kaji nübortemi atar matatet tejashi nung longkak ait nung dang government-i nübortem asoshi kanga nungdakba mapatema inyaktsür. Aji oda, tatsüba agi, mozü kidangi aotsüba lenmang yanglutsü asoshi nübortem longkak ait matatsüla ser nung longkak maitra lenmangji dang masü saka government mozü kijia kibur maliba oset ka amai küma aoer. Kasaji, tesem tesem nung government-i lapoktsüba kaketreju nung tesayur peria maliba agi tesayurtem yokang ta kaketshirtem longkak aita amongba asenoki angur. Ano, mapang mapang shia government tenzükertem nem ita sen shitak magütsütetba agi ita sen meshia longkak aitba angashir. Aji oda, longkak ait nung dang teinyaktsü tim inyaktsür aser tangutsü tim agütsür. Aji majep tashibo tetsü kinü tanur nem mama meyongdaktsüba amai lir. Ajisüaka, tetsü tajungibo mama yongdaktsüsa atema tanur ajep matar, iba jagi tanü asüng balaka asenoki tanur kinü ajepba kangabo mangashitsü. Ibaji mesüka government tajungi nübortem nungdak inyaktsüsa atema nübortem longkak ait matar, kechiyong government-ji nübortem nungdak reprangteta inyaktsüsa asoshi kümtet aser mapa shitak mapang shitak nung inyaka aotsü atema department aser ministry balala lemsar inyaker. Ajisüaka, aiben government nung inyaker temi nübortem tenzükba mapa nung inyaker masü saka peisasa pei tenzükba mapa nung pei ajungtsü aser pei akatsü atema inyaker amai bilema inyakba angur. Iba jagi nübortem nungdak inyaktsüsbajibo tim masüba mapa amato ka kümadoker. Aji oda, tanü Nagaland nungbo contractor-tema government nung alirtem aser aluyimertema government mapa nung alirtem ta nübortem nungdak peria inyaktsüba tagitarutsü maparem ajak to nübortem matong ser government nung alirtem rongnung dang longtepa inyakba asenoki angur. Iba jagi shitakba aluyimertem aser ayangertem taküm aser kibongtem rongsenren nung tajungba makümer. Tanü Nagaland nung election nung nübortemi pei temeten ayoktsüsa akümba timtem aser deraji, shitakba nungbo, yangji keta lir. Ashiko, iba ama nübortemi longkak mait tashi pei agitsü dang bilema inyakbaji government nung alirtemi tajunga ta bilema alitsüa akok, ajisüaka iba jagi nübortem dang masü saka tesüsabo peisasa pei akoksar atemtsü. Tanü nübortem ajak ajangzüksüba lenmang 'Foothill road' lapoktsü asoshia nübortemi longkak aita mapuso tashi government nung alirtemibo iba nungdakji rongdak nungngdak mapabo masü amai toktsür. Ajisüaka, nübortemi anung marem apu tulubabo renemtsüogo, saka lenmang maka ser apuji kechi sütsü ? Iba jagi ano tanga Nagaland Foothill Road Co\_ordination Committee (NEFCC)-i government dang iba tenemtsüng lenmang ya taküm kümsa yanglutsüla ta takangba ka agütsüba angashir. Iba Foothill Co-ordination Committee nung alirtem yagi iba lenmang ya parnok kisüng kidangi aoba lenmang yanglujang ta asüngdang ama tanen maka, government nung alirtem den nungsen tulu agia inyakba angur. Ibaji parnoki parnok nükla nung iba tenemtsüng lenmang lapoktet nungbo nübortem rongsen lenmang aisü nung ajangzüka anguba ajanga timtem aser nungsen arema inyaker ta asenoki angatetdi. Aji oda, foothill lenmang kisüng lapoktet nung Nagaland tesadang ka nem government-i mapa agütsür amai asütsü. Item ajangzük lenmangtemji government nung alirtem nükla nunga ngulasang, parnoki iba ama lenmang yanglutsü atemabo nübortem longkak ait matala. Aji oda, government-i dang gari lenmang lapoka toktsü nung, yang nung jagi nübortem asoshi ajangzüktemji parnoksasa inyaka agi tenzüksü. Atangji, asen lima nungbo nübortemi longkak ait nung dang tesayurtema yoker, lenmanga yanglutsür, light-a ajangba yoker ta süra ibaji Nagaland sobaliba akümer, anungji shibai metet, tenemtsüng lenmang yaa longkak khen aitli tatsüka yangluli, ano longkak khen aitli idangji aritepa tatsüka yangluli ta longkak terben shi ka ait nung dang gari jajattettsüsa renemtettsü südi !

## OLEMSABANG

### LKM-i AYONGBA WORLD ENVIRONMENT DAY AJANGA TULI NUNG ALIR ASOSHI TAJUNGZÜK TULU LIASÜ

~ Mr.Meyitongpang, General Secretary LKM

(Yashi adok nungi...)

'Sustainable Development' Omen nung ajemdaker jembidang Er. Bejontoshi-i yamai shia liasü; kechi koma mapa aika alima Tzü mopung kümzüka ayutsü atongaka asenok tebilembatem (mindset) memelenshira ajakji amajok, anungji tamasaba asenok tebilemba (mindset) melenshitsüla. "Advanced lima temi koma mining mapatem alima meraksa-i inyaker yamaji asenoki inyaktsüla aser iba ajanga employment aser rongsen renloker-ta" paisa ashi. Mining mapa inyakbaji mining planning meteta alirtemi tang inyaktsüla, koba agi 'Sustainable Development' nukjidongji atalokdaktsür, ta paisa lemsatep.

Maneni Shri. Ailong Phom ajanga ashibaji' Tuli ya jenjang aketba (resources) tem peria aliba aser shishilembatsü asoshi teyimla tulu aliba jaka ka lir, ta ashi. District ayika Tuli dak metaloker alir, anungji, Tuli ya kümzüka meytetra pa dak metalokba District tem asoshi jia teyimla mali akümer ta ashi. "Akhi otsüla obula nungertemi-a iba (resource extraction) mapa ya inyaka liasü saka parnoki 'Sustainable Development' nukjidongya meraksai aru. Anungji asenok tang putu-i iba inyakyimji benshia aotsüla" ta ajangshia liasü. Pa ajangasa LKM aser tesenteper organisation balala külemi longjemer Milaktsü meraktsü asoshi implementing Agency tem den tongtepratepti ta pai ashi.

Tatem nung Olemtepba mapang agiba ajanga nuburtem asoshi ajangzük tulu liasü. Iba mapang nung nuburtemi yamai asüngdanga liasü; Tuli area nung Coal mining ya joko küm ayika inyaka arur saka tanü tashi Department nungi Environment awarness agütsüba mali, Iba den külemi coal mining asoshi registration sen jenjang merijang menden nung dang saka lakhs menden nung dang meshir. Tuli nung coal mining asoshi register sur alirbo züngtetadang sura tanüngertemji illegal miners asütsüna?, mapa inyaker asoshi safety equipment shiba ajanga kong nungi angutsü?, Ali raksar toktsüba yanglushitsüji shiba khuret asütsü?, Naga commission 10% ali kibur temedenya koma aser kong nungi angutsü ta yimsusur, union balala, organisation balala aser nuburtem ajang tejangraba tulu nung asüngdanga liasü. Iba nung telangzüba kar yamia agütsü; Coal mining license lir ali raksaba meyaglutsürtemji illegal. Naga commission 10% ji ali kiburi Village council dang nungi NOC shidak meshia out source aser treasüre nungi ibai meshitsüla. Coal mining dak sendakba ajak kanga junga angatetsü asoshi 'Nagaland coal policy (First Amendment) 2014' azüngtsüla aser angatetsüla. Tatem nung Er.Bejontoshi-i iba sentong nung nuburtemi Department dang asüngdangba onuktemtem high authority den lemsatepba jembitsütsü ta shia nuburtem tzüra tema liasü. Tarutsü nung LKM-I ajangshia ali nungi rongsen bentenba telok (Union) ajak senteper committee ajangka tenteta tzü ali mopung raksaba yanglushitsü tenzüksü resolution ajang renema ayutsüla ta lokti nungi mepishia liasü. Sentong mapang tsü jemdaktsüba nungi shir inyakyim ajak nung plastic aser plastic bottle amala mamshiba ajang nuburtem LKM inyakyim nung temoatsü tulu ngua liasü. Iba sentong temer LKM aser Business Association of Nagas (BAN) Tuli Chapter külemi longjemer Tzüdikong aser Tuli nung sungdongtemja liasü. Iba sentong ajang 'MerandDo Jamir' youtube channel nung angutsü.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazüngeru angateta agitsü mepishir**

## Christian Broadcasting Network tentetsang, Pat Robertson süogo



Tele evangelist, Pat Robertson (mena alisang) den pa kinüngtsü, Adelia Elmer (Dede) aser tangartem noksa nung angur.

**June 08, 2023:** Television ajanga ministry mapa mezüng tenzüksang aser Christian Coalition advocacy group tentetsang, Pat Robertson alima nungi pilaogo; pa arrshi küm 93 liasü.

Brihostibarnü (June 8, 2023) Robertson asüba osangji pai 1960 küm tenzüka Christian Broadcasting Network ajanga metetdaksü.

Küm aika "The 700 Club" ketdangsüa agisang, Robertson 2018 küm nunga stroke süa liasü. Pa ya taoba mapang Southern Baptist nunga pastor inyakogo.

Pai US Tir election nung tokteptsü nükjidong nung 1988 küm Republican nomination atema nüboyim tenzüka liasü aser Iowa nungbo temaba jenjang angu. Tetenzüklen pa jenjang junga liaka tesülen pa jenjang mejungi akümba ajanga pai anenadok.

1989 küm pai Christian Coalition tentet aser ibaji ajanga linük yimtiba nung conservative Khristantemi pei temeden atema nokdakteta liasü.

Pat Robertson ya Yale law school nung graduate asü aser U.S. senator, Absalom Willis Robertson'er jabaso.

Robertson-i Khristan conservatives dang America nung loktiliba temenentem anema raratsü ajungshi aser tanur raksatsü melaba, tebur o tebur na shi nung medemba aser sorkar mapatongtem anema ola adok; item ya kibong anemba aser Tsüngrem anemba temenentem lir ta pai aitsü.

Robertson-i tentetba Christian coalition nungi Christian candidates aika adok aser 1995 küm tashi nungbo iba telok nung züngsem million 1.6 aküm.

Pai ketdangsüa agiba "700 Club" sentong ajanga US nung pa kanga nungtugu aküm aser 1980s tashi nungbo Christian Broadcasting Network ajanga kibong million 30 shi ayimjem aser küm shia dollar sen million 200 dak tema ajangzükteta liasü.

2005 küm pai US dang Venezuela nung leftist president, Hugo Chavez tepsettsüla, kechiyong ibaji ajanga rara tulu adoktsü aliba nungi kümzüksü, ta jembia liasü.

Marion Gordon Robertson ya 1930 küm March 22 nü Lexington, Va. nung aso aser kibong nung jabaso ana rongnung tanubosang liasü. Tedi-i pa dang "Pat" ta aja, iba sülen nungjagi pai pa nungja Pat Robertson ta amshi.

Pa tebuü küm 34 tashi Congress nung tenzüka aser tetsü, Gladys Churchill Willis-i Tsüngrem tenzüksü atema pa taküm bendanga agütsütsü

ajungshia liasü. Robertson tebou nung anaprongla Baptist Arogo nung tenzükertem liasü.

1955 küm Robertson-i Yale nung Law degree angu. Yale nung pai nursing student, Adelia Elmer ajuruba sülen 1954 küm tena kibong aküm. Tena tanur pezü-Timothy, Elizabeth, Gordon aser Ann nung sosema lir. Pa kinüngtsü mapang talangka cancer tashidak agi shirangba sülen yaküm süogo.

Tetsüi pa dangi Baptist evangelist ka yokba ajanga pai tanaben Khrista agizüka New York Theological Seminary nung azüng aser 1959 küm master's degree in divinity in renema liasü.

## ANOGO ABEN TSÜNGREM DEN

Tezülen atongba - Luke 5:1-11  
Nütsüngsüba tendangba

Aser Simoni ashi, Kibuba, ammag tepiyong onoki inyak aser kecha mangu; saka Nai ashiba ama ni zütsüktem aontsü. Luke 5:5.

Simoni pai angashiba nung tamang mekateti liasü. Yisui shidakba orr pa zütsüktem aontsü ashi asü? Pa zütsüktem tapok ateper külen aontsü ashi asü? Aser ammag tepiyong zütsük oner kecha mapuba sülen, Simon tejak koma sür alitsü asenoki yimdangi arur: "Kecha meinyaker! Ni tamachi masü".


Pai yamaji inyaker ali asübo asenoki angu pur Simon; shiba Peter agi melen, tasü tait nütsüng indang kecha mangashi lila. Pai pa taküm nung mapang tajungji züdoker lila. Ibai lendongbang mapang ka liasü. Yisui nütsüngbaji tendanger tendangtsüsa liasü asü? Pa telangzüba jagi ibaji kuli asür.

Asen Kibubai maneni iba yimya nung tendanger. Pai agütsüba mapaji teti asenoki aginüba ama masür - Pa kulitem asütsü kodang asenoki tsübudir magizüki aontsü melen kidang alitsü bilemra, inyaktsü melen sen dang agütsütsü bilemba, iba ama inyakba aser bilemba jagi nütsüng ka asütsü temsüa mekümdaksür.

Saka meinyakba tetezü taküm nung mapang tajung zütoker. Peteri iba anogo nung Kibuba o meindokba ajanga iba anogo mapaji tesama maküm. Asenokia yamaji inyaktsü.

Onok nem ajemalu temulungjang aser terenem shisatsü agüjang, temeim Kibur, Ne O nung onok nütsüngsüba tetendangba inyaktsü renema lidakjang, Yisu tenüng nung. Amen.

## Kerala nung Arogoi lapokba shisaliok rejutem anema inyaker: KCBC



Amal Jyothi College of Engineering building aser second-year food technology student, Sradha Satheesh noksa nung angur.

**June 08, 2023:** South India kübok aliba Kerala state nung Arogoi lapokba rejutem anema asalentong yanglur inyakdar, ta putirtemi metetdaksü.

Arogoi lapokba kanga nungtugu engineering college ka nung azünger tetsür ka soseba asüba sülen anogo ananü tashi longkak aita liasü.

Kerala kübok Kottayam district nung aliba Kanjirappilly Arogoi 2001 küm lapokba Amal Jyothi College of Engineering nung second-year food technology student, Sradha Satheesh-i June 2 nü college hostel nung soseba asü.

Arrshi küm 20, Sradha-i subject aika nung tamakok ngua liasü, ibayongji lai soseba asütsü apitet südi, ta bilemer.

La soseba asüba sülen anogo ana lir iba college nung azünger kaketshirtemi longkak sashia

aita college ketdangsertem aser staff tem nem temerenshi agüjang ta takhangba agütsü. Iba mapang nungjagi tenzüka college ketdangsertem college shibanga lir.

June 6, 2023 nü Kerala Catholic Bishops' Council (KCBC) Tir, Cardinal Baselios Cleemis-i sangdong ka ajanga, "Tang college nung longkak aitba ya Khristan shisaliok rejutem anema yangluba asalentong shilem ka lir," ta metetdaksü.

Eastern rite Syro-Malankara Catholic Church nung tongti, Cardinal Cleemis-isa state sorkar dang Khristantemi lapokba shisaliok rejutem kümzüksü atema inyakdaksüner, ta mepishiogo.

Iba college ya state nung aliba engineering colleges rongnung tajungtiba lir, aser iba college ketdangsertem anema longkak aitba nungji ruling

Communist Party indang student wing, Students' Federation of India (SFI) nungi züngsemtemi tongti shilem agiogo.

Cardinal Cleemis-i, kaketshir ka soseba asüba bushisüngdangba nungji college ketdangsertem akoba tashi amaliteptsü, ta metetdaksü.

Kanjirapally Arogo nung vicar general, Father Boby Alex Mannamplackal-ia sangdong ka ajanga kaketshir ka soseba asüba atema mangyim jashi lemsatepogo.

Mannamplackal-i video osang ka ajanga, la asüba nungji tangar dak melung malemtsüsa kecha mali, ta metetdaksü.

"Onoki la ceiling fan nungi lisü agi tekong nung alenseter anguba mapang nungjisa anasatiba nija hospital kati anir oa liasü," ta pai metetdaksü.

"Iba mapang nungjisa onoki

police aser lar kibong züngsemtem nem iba osang metetdaksü. Lai soseba asütsüsa telemtetba agiba kuliji jungjunga bushisüngdangtsü onoki mepishiogo," ta paisa metetdaksü.

Sodi tembangba sülen June 1 nü Sradha Satheesh hostel-i meyipa arua liasü aser kasa anogo nungjisa tatidang agiba results sangdong.

Iba sülen la medemertem den külemi chiyungi ao aser hostel takdang nung among. Lar medemertem meyipa arudang la takdang shibanger liasü, anungji kishi kakkoker reprangdang nung la tsüngbang nungi lisü agi soseba sür lia angu, ta putirisa metetdaksü.

Iba tatalokba sülen college kiojen raksaja longkak aitba atema putiri SFI züngsemtem aitsü.

Kerala nung Arogoi lapokba shisaliok rejutem anema inyakba ya tang mezüng masü, ta June 7 nü Father Jacob G Palakkappilly-i osangbenertem nem metetdaksü.

Kerala nung nütsüng million 33 lir aser Khristan nütsüngbo shilem 18 dang lir, ajisüaka Khristantemi Amal Jyoti College of Engineering densema state-funded schools & higher education institutions 5,000 dak tema achaayanger.

AO OSHI ANGAZÜKDAK:

TANÜ ANGAZÜKTSÜBA OJANG



Rangrangtur

(adj) tekara aser pungpapungpar ( light and fast)

\* Moababo tangar ama masü kanga rangrangtur.

Rangsa

(v) nok mesüra süngratsü agi aika kümdaktsü (cut into pieces)

\* Süngratsü agi au pongdang rangsa aser yangji ango rangsar asen.

OLONG PAITEP # 6540

16x16 crossword grid with numbers 1-16 indicating starting positions.

TIPIEN

- 2. Auo nung chiyongtsü asenba
5. Mangyimba mapang
7. O lamendakdak
8. Peidak malangba
10. Juli
12. Sen ayudak
14. Tenük agi ajitet
15. Tamajung aküm
16. Apuso

LANGTSÜNGLEN

- 1. Lenmang
2. Aor kidong ka tenüng
3. Tenarong maten
4. A \_\_\_ g
6. Mopung apodoka
9. Tongtipang tagitsü
10. Menungra bilem
11. Aiür
13. S \_\_\_ k
14. T \_\_\_ r

OLONG PAITEP # 6539 TELANGZÜBA


TIPIEN :

- 1. Yiar, 3. Tesola, 7. Yimra,
8. Tangar, 9. Peria, 10. Tanur,
11. Tasen, 13. Lemjem,
15. Tambu, 16. Khuret,
17. Sang.

LANGTSÜNGLEN :

- 1. Yimti, 2. Amen, 4. Shiner,
5. Alaka, 6. Satan, 9. Putet,
10. Tembar, 11. Tatok,
12. Amang, 14. Jala.

Agüja aliba noksa nung meputepi aliba 11 bushiang



Tanur asoba anogo nung salem osang den noksa angati adokdaksünura - Tenüng, Küm, School, Talidak & salem osang tejangja zülur, noksa (photograph - any size) ka den anogo 3 mesüra 4 jelia e-mail : tirimiyim@gmail.com nung yokang mesüra Tir Yimyim bureau tem nung agüjang.

- 1. Tenüng : .....
2. Tasoba anogo: .....
3. Küm : ..... 4. Class : .....
5. School : .....
6. Talidak : .....
7. Salem osang : .....

Tepela Tasoba Anogo



AJYCP-i Arunachal nung nisung ana tepsetba bushisüngdangtsü akhanger

Itanagar, Aami/June 8 (Agencies): Arunachal Pradesh, Lower Siang district nung Kangku circle kübok Torajan tesem nung nisung ana tepsetba dak sendakba nung Asom Jatiyatabadi Yuba Chatra Parishad (AJYCP)-i Assam ketdangsurtem nem takhangba ana agütsüogo, ta Arunachal Times sangdong ka ajanga metetdaksü.

AJYCP züngsemtem Dhemaji districts kübok Lakhimpur nung Mongolbar aonung senden ka amenba sülen parnoki Arunachal sorkari asür kinungertem nem sen lakh 50 aser yirur alir kinungertem nem sen lakh 5 agütsütsü asoshi takhangba agütsüogo.

Maneni parnokisa, ken o dak sendakba nung Arunachal Pradesh police-i pua alirtem ajak Dhemaji police nem agütsütsüla aser iba takhangba ya mataloktsüra parnoki rongsenketzüng nung tenokdangba agütsütsü ta amokmerenogo.

Mangatetep aliba ali ka dak sendakba nung Assam aser Arunachal nungi nüburtem mangatetep adokba sülen June 5 nü lendong tulu atalok aser iba lendong nung nisung ana khaset aser nisung asem yirua liasü.

Kasa mapang nung nisung tepsetba dak sendakba nung Asomiya Yuva Manch (AYM)-i Brehostibarnü anepdang 5 ako

nungi nikongtsütsü 5 tashi Lakhimpur-Dhemaji mokdanga ayutsü sangdonga liasü ajisiuka mapa tatsüka lir iba sangdong ya aginatok.

North Lakhimpur police-i tesem kar mokdanga ayuba ya oziung alema ta sangdongogo.

AYM secretary general, Anupan Saikia dangi yokba legal notice ka nung, police-i pa dang iba tenokdangba agütsüba ya agintsü atema tetuyuba agütsü aser yimjung nung alitsü atema teka amteper inyaksü ayongzüka liasü.

Nisung ana tepsetba dak sendakba nung nisung pongu apuba indang jembiba mapang Arunachal nung amendaker aliba lokti tentet aikati pua aliba nisungtem pusema jembiogo.

The Galo Students Union, Galo Youth Organization aser All Lower Siang District Students Union-i Lower Siang deputy commissioner dangi yokba külen shiti ka nung ashiba agi, pua alirtemi kecha aibelena mali aser parnok iba tatalokba dak sendaka mali.

"Pua alirtem rongnung GB aser yimtsüng asem nungi Panchayat lenirtem ya iba lendong atalokba anogo Torajan yimtsüng nung mesüra parnok yimtsüng nunga maliasü.

Parnok Gensi Circle nung senden ka nung shilem agia liasü. Pua alirtem ya karbo Torajan yimtsüng nungia masü aser

parnoki iba tatalokba indang kecha memetet.

Onoki metetba tashi nungbo law enforcement agency-i parnok tashiyim agi apu aser parnok ya tim mesüi Likabali PS nung sota yua lir," ta lokti tentet asem yagi ashi.

Maneni parnoki. Pua alirtem takaratiba nung mechiokra parnoki democratic movement ka tenzüksü ta tekümdangtsü metetdaksüogo. Parnoki iba ken o ya kecha tebandang makai bushisüngdangtsü takhangba agütsüogo.

Ano parnoki iba ken o nung densembe atema Durga Bora anema FIR ka benokogo.

"Torajan yimtsüng nung aliba nüburtem aser Assam nung kidanger yimtsüngtem yimjung nung dang lia aruogo. Durga Bora ya lokti anem inyaksangshiba maparen nung densema lir aser pa ajangzüksü atema nüburtem rongmesoba nung mongin lir.

"June 5 nü lendong atalokba ya Arunachal nung meyong ali atsüngtsü merangba ajanga atalokba lir. Tai maketba nisung taküm samaba ya pa khuret lir," ta parnoki FIR nung shia lir.

Nisung tepsetba atema aitsüba den parnoki asür kinungertem den asüku lemsatepogo aser aibelena alir shitakba aputsü atema ken o kanga junga bushisüngdangtsü atema takhangba ka agütsüogo.

Manipur nungi nisung 10,000 dak tema Mizoram nung jenoka lir

Aizawl, Aami/June 8 (Agencies): Manipur nung kin o kin tsüngda mepetmesü tulu adokba ajanga jena oa Mizoram nung jenokertem 10,000 dak tema jungogo, ta state home department ketdangsur kati metetdaksü.

Ketdangsurü ashiba agi, kidanger state nungi nüburtem maneni jena arudar, kechiyong Union Home Minister Amit Shah-i state semdangba sülena Manipur nung maneni lendong ataloka arudar.

Taoba ghonda 24 tsüngda nisung 409 Mizoram-i aitba sülen ajak senteper nisung 10,091 district 11 shi nung jenoka lir, ta pai ashi.

Pai ashiba agi, Manipur nungi jena aoertem ya timba community hall, school ama sorkar kitem aser yimtsüng balala nung amenokja aliba makeshift relief camp tem nung jenoka lir aser tanungba ya parnok kinungertem kidang jenoka lir.

District administrations, NGO, Arogo aser yimdaklirtemi parnoki nem chiyongtsü aser tanga tenüngdakba osettem agütsüdar, ta pai ashi.

Ajak senteper nisung 3,558 Mizoram kübok Kolasib district nung, Aizawl district nung 3,537 aser Saitual district nung nisung 2,440 jenoka lir.

Aizawl aser Saitual district naprongla ya Manipur kübok Pherzawl aser Churachandpur district den arrtsü nung lir.

Tanungba nisungtem ya Champhai, Khawzawl, Serchhip, Mamit, Lunglei, Hnahthial aser Siaha district tem nung jenoka lir.

Sorkari item nisungtem nem teyari agütsütsü atema centre dang nungi sen crore 5 teyari meshiogo.

Myanmar aser Bangladesh nungi refugee tem khuret bener aliba mapang ka nung tang Mizoram nem ano khuret talila bendenloktsüogo. Home department-i ashiba agi, Myanmar nung 34,000 shi aser Bangladesh nung 700 dak tema tang Mizoram nung jenoka lir.

KOHIMA ONGPANGKONG TELONGJEM



17 BUBA N.I. JAMIR ACADEMIC EXCELLENCE AWARD

10th June 2023 10:30 Ako (Anepdang) MÖLU KI, Merhülietsa, Kohima

Nükjidong : Takotet Kaketshir

TONGTI O JEMBIR :

Wb. TEMJENMENBA

Hon'ble Advisor

Transport, Technical Education Nagaland

SENTONG LENIR:

Sp. TIATOSHI JAMIR Kr. TEMSÜMENLA PONGEN

AWARD ANGURTEM:

- 1. Kr. Mulungsula Changkiri ( Changki ) -10th
2. Sp. Imnaakum Imsong (Unger) -11th
3. Kr. Jungshinungla (Changtongya) -11th
4. Kr. Rongchensenla Yar (Longkhüm) -12th
5. Kr. Wangshizenla (Ungma) -13th
6. Sp. Imtitongzuk (Dibuia) -15th
7. Kr. Maongkala M. Imchen (Mongchen) -16th
8. Kr. Sungtiben Kichu (Chungliyimsen) -17th
9. Kr. Molungben Longkumer (Changki) -17th
10. Kr. Rongsennungla Longchar (Chungtia) -17th
11. Kr. Imnasenla M. Longkumer (Wameken) -18th
12. Kr. Temsümenla Jamir (Khar) - 20th



**NORTH WESTERN RAILWAY SPORTS ASSOCIATION**

**Anuj Kumar Tayal**  
 IRSSE  
 Hony Gen. Secretary NWRSA  
 &DGM/G/NWR

21, Head Quarters Office  
 North Western Railway  
 Near Jawahar Circle, Jaipur-302017  
 0141-2725844, 2725819 (Fax)  
 Mobile No. 9001195010  
 Dt. 29.05.2023

No Sports/NWR/023/Rec./2023-24

Executive Director  
**NS, NIS, Patiala**  
 Old Motibagh, Patiala, Punjab

Sub: Recruitment of sportspersons over North Western Railway against Talent Scouting Quota for the year 2023-24.

We are happy to inform that North Western Railway headquartered at Jaipur proposes to recruit outstanding sportspersons under talent scouting quota in Group 'C' category in the current financial year (2023-24) in the following games/events.

Sr. no.	Game	Event	Pay Band (PB), Grade Pay (GP)
1	Athletics	Hammer Throw (Men)	PB -1 Rs. 5,200 – 20,200,GP- Rs. 1900/2000
2	Boxing	71 Kg (Men)	PB -1 Rs. 5,200 – 20,200,GP- Rs. 1900/2000
3	Wrestling	70 Kg FS (Men)	PB -1 Rs. 5,200 – 20,200,GP- Rs. 1900/2000
4	Wrestling	79 Kg FS (Men)	PB -1 Rs. 5,200 – 20,200,GP- Rs. 1900/2000
5	Shooting	10 Mtr Air Rifle (Men)	PB -1 Rs. 5,200 – 20,200,GP-Rs. 2400/2800

The recruitment will be conducted as per the norms laid down in the Railway Board's letter no. 2010/E (Sports) 4(1)/1(Policy) dated 31.12.2010 (RBE no. 189 (B) /2010 & letter no. 2018/E(Sports)/4(1)/14 dated 13.08.2019 (RBE no. 128/2019 (copy enclosed) read with notifications issued from time to time.

You are requested to direct the outstanding sportspersons fulfilling the requirement norms to contact on the following address latest by 15.06.2023

General Secretary, NWR Sports Association, Room no. 21, Sports Cell, Ground Floor, NWR, Head Quarter Office, Near Jawahar Circle, Jaipur – 302017 (Mob. No. 9001754321).

*(Signature)*  
 (Anuj Kumar Tayal)

**Copy:**

1. Director, Department of Sports & Youth Affairs.
2. Secretary, Athletics, Boxing, Wrestling, Shooting federation of India.
3. Secretary, Rajasthan State Sports Council.
4. Secretary, Rajasthan Athletics, Boxing, Wrestling, Shooting Association.
5. CIO/NWR- for upload of Talent Scouting Vacancy on NWR website.

**China nungger warplane 37 Taiwan indang defence zone telungi ait**

**Taipei, Aami/June 08 (Agencies):** Ghonda trok tsingta China nungger raradang amshiba tayimtsü 30 dak tema Taiwan indang air defence zone telungi ait, ta iba asetkong indang defence ministry ajanga Brehostibarnü ashi, koba China mitkari anogo ka nung tashiyim amshia par litsü aitiba tatalokba tesashi ka alitsü.

Pei sasa yimsü asüba Taiwan ya China-i par litsü ta ashi aser künü anogobo agitsü nangzüka lir aser nungdakra tashiyim amshitsü ta ashi.

Beijing-i iba asetkong indang air defence identification zone telungi temelaba makai tayimtsü yokba tang tali kumogo aser 2021 dang anaben agi tali 2022 kum tayimtsütem Taiwan litsü aiter.

Taiwan indang Ministry of National Defence odongtar Sun Li-fang ajanga Brehostibarnü sangdong ka nung ashiba agi, Brehostibarnep 5:00 ako nungi tenzüka Chinese military aircraft 37 tashi Taiwan indang southwestern ADIZ telungi ait.

"Kar maneni Western Pacific tsütsü long-range reconnaissance training atema ao," ta Sun-i anügdang 11:00 ako meta ashi.

Taküm kum tenzüker litsü alema aitiba rongnung tang ya tuluba masü, saka Brehostibarnü atalokba ya mapang tatsüba tsüngta alitsü. April 9 nü tayimtsü 45 tashi par airspace telungi aita liasü.

(Maneni tapak 8 nung...)



**NOTICE FOR CLOSURE OF BRANCH OFFICE LOCATED AT DIMAPUR**

This is to bring to the kind notice of Policyholders of Future Generali India Life Insurance Company Ltd. ("Company") and general public at large that due to administrative reasons, the Company is closing their existing Branch Office situated at 4<sup>th</sup> Floor, Reliance Trends Building, Agarwal Tower, Opposite Vishal Mega Mart, Circular Road, Dimapur, Nagaland - 797112 with effect from 11<sup>th</sup> August 2023.

Post the closure of the aforesaid Branch, with effect from 11<sup>th</sup> August 2023, you are requested to please visit at the below mentioned Branch Office for any servicing requirement with respect to your policy taken from the Company or for any general enquiry pertaining to life insurance products.

**Future Generali India Life Insurance Co. Ltd.**  
 2<sup>nd</sup> Floor, Jiwani Geet, A T Road, Jorhat, Assam - 785001

You can also get in touch with us at:

1800 102 2355 | care@futuregenerali.in | Visit our customer portal: customer.life.futuregenerali.in

Assuring you our best services.

Registered & Corporate Office: Future Generali India Life Insurance Company Limited  
 Unit 801 and 802, Tower C, Embassy 247 Park, LBS Marg, Vikhroli (West), Mumbai - 400083  
 Visit us at: https://life.futuregenerali.in

CIN: U66010MH2006PLC165288 | IRDAI Registration No: 133

**Mike Pence-i 2024 US tir election atema nübuyim tenzükögo**

**Ankeny, Aami/June 08 (Agencies):** Taoba mapang US indang tatong tir inyaka alisang Mike Pence-i 2024 US tir election atema nübuyim tenzüköba mapang Donald Trump kanga sashia aija liasü.

Trump-i US constitution sülen manidak aser conservative tamendak dak senzüka yutsü, ta Republican lenir Pence-i ashi.

Taoba mapang Indiana governor inyaka alisang aser congress züngsem Mike Pence-i White House asoshi nübuyim Bodhbarnü tenzüka liasü.

Iba sangdong ya ajanga Pence ya anaben külemi toktepsang aser 2017-21 tashi White House nung pa dang temaba sür inyaksang Trump den tokteptsüsa akumer.

Ankeny, Iowa nung jembidang, January 6, 2021 nü US Capitol amaktsü nisungtem dang Trump-i ajungshia liasü

aser election result melenshitsuksü kü dak tashi lir ama bilema liasü, ta Pence-i ashi.

"Saka America nüburtemi ya meteta alitsü nungdaka lir, iba anogo Tir Trump-i küdang pa asü constitution shimtsü ta asüngdang," ta pai ashi.

"Anungji nüburtem asoshi teshimtsü kasaji ajurutsü. Ni constitution shim aser teti shimtsü."

January 6 nü mapa mechi Trump ya tanaben tir meinyakdaksütsüla, ta pai ashi.

"Shibasa constitution dang temaba nung ali, parnokji kodanga United States tir mesüdaktsütsüla ta ni amanger," ta pai ashi.

"Aser shibai nisung kar dang parnok constitution dang temaba nung yutsütsü asüngdang, parnokji kodanga Unites States tir

**MULUNGNEN O**



**ASANGLA WALLING**  
 15.03.1958 - 31.05.2023

Asür **Asangla Walling (Dibuia)** Mr. N. Imti Ao (NCS Rtd) Kinüngtsü, iba akumli wadang tembangba anogo, temeimer shirnokisa ozü asüko mangyim mapang nung nübü, shisatsü, sarasadem aser aria bilemba lemsatepba ajanga ozü mangyim jashi khuret tepungbaba kümdaktsü, nenok ajak dang kangasa pelaba lemsateper.

Nenok ajak Tsüngremi maneni moajang ta ozü tamang sarasadem.

**Temeim Kinüngbo, Chirnurtem, Semchirtem aser Kinüngertem.**

**KANGASA PELABA LEMSATEPER**



**ASO : 02/05/1947 - ASÜ: 02/06/2023**

**"Kibubai agütsü aser Kibubai bener ao; Kibuba tenüng moajang" Yob 1:21**

Teti meima aliba ozü tsürabur asür **WAITOLA (Akhoya)**, shirangba anogo nungi tasü nu tashi Arogo, lokdi aser kija kibong kwi kati ozü asüko mapang nung nenok Sarasadem, nübu, mapang aser rongsen agi yariogo ajak dang kangasa pelaba lemsateper.

Nenoki ozü dang ajungba yari meyipa agutsütsü kecha maka saka Tsüngremi nenok ajak moajang ta ozü tamang Sarasadem.

**Temeim Chirnurtem, Semchirtem aser Anükapangtem.**

**ATM CARD KA SHIA LIR**

MTBA downstair nung aliba NStCB ATM Booth nungi ATM card ka shia arua Tir Yimyim Office Mokokchung nung tokja lir. Kiburi office mapang arua agizüksü asoshi metetdaksür.

nunga pai maneni pa den tokteptsüpur aitsü aser taoba mapang Trump-i Russia Tir Vladimir Putin ya tekolok techira ta ashiba aija liasü.

"Tekolok techira aser rara mapang mapa tamajung inyaker tetsüngta ni meteta lir, aser Ukraine nung rara shibai akoktsüla, ajia ni meteta lir," ta pai ashi.

Ajisüaka ano Trump-i office yutsüba sülen tongtipang kuli kakat tem meshidaki amshiba atema bushisüngdangba asoshi prosecutor tem aitsü aser United States nung taoba tir ka anema ken o benokba ajanga alima dang yimya kanga tamajung sayur, ta ashi.

Tongtipang kuli kakat tem amshiba tsütsü Pence-i aibelena inyakba mali ta taoba hopta ang prosecutor temi temeden agüja liasü.

(Maneni tapak 8 nung...)

mekumdaktsütsüla." Arishi küm 64 tain Pence-i Democratic telok nungi Tir Joe Biden-a aija jembia aser America nungger mangatetep adokdanga kati ka akumtsüboa aser temeim agi anepalua amshir, saka Trump tena dak iba molungsentü mali, ta ashi.

Pai Trump den mangatetep adokba indang timba jembia liasü, saka pai ano Republican nungi 2024 küm tir election nung tokteptsü nübuyim tenzüka alisang Florida Governor Ron DeSantis-a aija liasü.

"Donald Trump aser dangartem shirnokisa tir inyaktsü jangra ali, parnokji alima sapang nung akhi mapang nungi inyaka aruba asen mapa meinyaki aotsü," ta pai DeSantis aija ashi, shibai tawa Ukraine nung rara indangnung jembiba asoshi aitsüba alitsü.

Iba sülen ano CNN town hall

## 2buba Women's Champions Trophy asayamung osang

**Dimapur, Aami/June 8 (TYO):** 2buba Women's Champions Trophy asayamung nung Brehostibarnü Nagaland Cricket Stadium nung mezüingbuba asaya Puliebadze Slingers-i wicket ka agi Pauna Queens madak Super over nung takok ngua liasü. Asaya run kasasa nung tembangba sülen super over asaya liasü.

Asaya nung Pauna Queens pur mezüing batting amen aser parnoki over 20.4 nung run 59 dang yanglua liasü. Slingers atema Priyanka aser Mukti nati wicket asemsem agi aser Meriyani Kikon-i wicket ana agi. Pauna Queens atema Anupriya-i dang tera junga asaya run 11 yanglu.

Asaya akoktsü atema run 60 nungdaka asaya tanabuba shilem tenzükba sülen Puliebadze Slingers-i asaya kanga junga tenzükker aser opener Illuneule-i run 24 ajisüaka Elina Muru, Merensola aser Sangtinario nungeri wicket asemsem agia Slingers pur nem run 59 dang yangludaktsür over 17.1 nung ajak out sütsü.

Super over nung Puliebadze Slingers-i wicket ka agi Pauna Queens madak takok ngua liasü. Asaya nung player of the match naroküm Priyanka nem agütsü.

Tanü tanabuba asaya nung Saramati Warriors-i wicket 8 agi Terogvu Titans kokogo.

Toss akokba sülen Terogvu Titans-i mezüing bat asütsü shim aser over 25 nung asayar ana out ser parnoki run 90 target yanglua toktsü. Parnok rongnungi Iduabeule aser Limatula nati run 26 aser 28 yanglua liasü. Warriors atema Sariba-i over 5 nung run 9 agütsür wicket 2 agi.

Asaya tanabuba shilem nung Jyoti-i maneni kanga junga asaya run 32 yanglu aser la nem Sariba-i (31) kanga junga teyari agüja Warriors puri iba asaya ayong ayonga koka liasü.

Asaya atema Player of the match Sariba nem agüja liasü.

Kasa asayamung nung Sovima Cricket Ground nung Brehostibarnü Japfü Dazzlers aser Tiyi Strikers na asaya, koba Dazzlers-i wicket 10 agi kokogo.

Mezüing bat amenba sülen Tiyi Strikers-i over 25 nung asayar 8 out ser run 44 dang yanglua liasü. Parnok rongnungi Sentilemla-i dang tera junga asaya run 12 yanglu. Dazzlers atema Bipila aser Najmeen nati wicket anana agi aser Talirenla, Alamlie aser Alemienla nungeri wicket kaka agia liasü.

Run arishiba mapang Japfü Dazzlers nungi asayar Najmeen-i run 24 aser Alemienla-i 12 yanglua tenati dang out mesüi asaya over 9.1 nung kokatok.

Asaya nung Najmeen nem player of the match naroküm agütsü.

### Hokolbarnü asaya:

Venue - Nagaland Cricket Stadium.

1st Match- 08:30AM

Japfü Dazzlers Versus Pauna Queens

2nd Match- 12:30PM

Saramati Warriors Versus Puliebadze Slingers

Venue- Sovima Cricket Ground.

Time- 12:30PM

Terogvu Titans Versus Tiyi Strikers.

## Liverpool-i Mac Allister £55m agi alizükogo



**Aami/June 8, 2023 (Agencies):** Liverpool-i küm pongu atema Brighton nungi midfielder Alexis Mac Allister pound million 55 agi alizükogo.

Brighton pur taoba season nung Premier League nung jenjang trokbuba nung tembanga tang mezüingbuba Europa league atema qualify asüba nung Argentina nunger asayar yagi kanga tongtibang shilem agiogo.

Arishi küm 24 tain asayar yagi Brighton nungi 112 ben asayaba mapang goal 20 idaktsüogo aser Argentina-i 2022 World Cup akokba nung teyari agüja liasü.

"Ni kanga pelar, iba ya nükjidong atalokba ka lir aser asaya tenzüktsü matateter," ta Mac Allister-i ashi.

"Ni pre-season mezüingbuba anogo atema form nung liner, anungji maparen ajak tembangtetba atema pelar. Ni team-mate tem den ajuruteptsü yogya atar.

"Taküm küm ya ni atema küm tajung ka lir, kong World

Cup akokba aser Brighton nung onoki ajangzükttetbatem densema lir. Ajisüaka tang Liverpool indang bilemstsü mapang tongogo aser anogo shia nisung aser asayar tajungba akümtsü merangtsü," ta pai ashi.

James Milner, Naby Keita aser Alex Oxlade-Chamberlain nunger ajaki club toktsür aoba mapang ka nung Liverpool manager Jurgen Klopp-i midfield akangshitsü atema jenjang agidar.

Mac Allister ya Argentinos Juniors nungi 2019 küm Brighton nung arua aden aser iba sülen ano Buenos Aires club yagi loan nung meyipa ao.

Pa Argentina tenüing nungi 16 ben asayaogo aser pa ya December ita World Cup akokba team nung tongtibang asayar ka liasü.

"Worlds Cup akokba sülen ni kü sasa dang ni ano takok marok aika kokner ta shia liasü aser iba club yagi nükjidong ataloktsü atema teyari agütsütsü ta bilemer," ta Mac Allister-i ashi.

## Wrestler temi longkak aitba sentong thinena atar

**Aami/June 8, 2023 (Agencies):** Longkak aita aloiba Wrestler temi Bodhbarnü sangdong ka ajanga, longkak aiba sentong ya June 15 nü tashi thinena ataba metetdaksüogo.

Sorkari WFI tir Brij Bhushan Sharan Singh anema chargesheet benoktsü aser federation indang election iba ita tatemi agitsü ta tenangzükba agütsüba sülen parnoki iba telemtetba agia liasü.

Union Sports Minister Anurag Thakur-i jaokba sülen Bajrang Punia aser Sakshi Malik nati pa den ajurutepa liasü. Union Home Minister Amit Shah den ajurutepba

parnok takhangba indang sensak asemba sülen anogo asem lir Thakur den ajurutepogo.

Longkak aita aliba wrestler temi Singh aputsü akhanger, shiba-i aiür chanu ka densema tetsür wrestler tem dak mebeshitsüba yimya beshiba atema aitsür lir. Senden amenba sülen Malik aser Punia bnati osangbenertem dang, parnok anema FIR benoka aliba dena agintsütsü ta tenangzükba agütsüogo, ta ashi.

Longkak aita aliba wrestler tem aser parnok pusemertem-i May 28 nü temelaba magi oziing alema Parliament ki tasenba leni aoba atema aitsür liasü.

"Singh anema police-i ken o bushisingdanga aliba ya June 15 nü tashi nungbo tembangtsü ta onok dang shiogo. Iba anogo matong tashi longkak maiti atatsü atema onok dang asüingdangogo," ta Malik-i ashi.

Ajisüaka Malik aser Punia napronglai longkak aitba ano metembang aser parnoki iba sentong ya sorkari mepeshiba ama June 15 nü tashi dang atsülanga atar, ta ashi.

Senden amenba sülen osangbenertem den sensaksemba mapang Thakur-i, senden tangatetep nung menogo aser sorkari longkak aiteremi akhangba agizükogo, ta ashi.

## Mike Pence-i 2024 US tir election...

(Tapak 7 nungi...)

Iowa state fairground koba dang Roast and Ride ta ajar, iba tesem nung taoba hopta tatemlen fundraising sentong ka alidang Republican telok nungi tir inyakner nisung ti adenshiba rongnung Pence ya ka liasü.

Iba tesemi pa Harley Davidson ka nung aru aser pa meina bikers noklang aika convoy nung arua military veterans atema sen bendenja liasü. Saka iba mapa kisüngi pa tir asoshi tokteptsü merangba nung jangratem ka mesayuteter.

Reuters-Ipsos survey ka taoba ita sayaba nung Pence tir inyakdaksütsü molunger shilem 5 dang liasü aser Trump bukumer shilem 44 liasü.

2024 nomination asoshi Republican nungi nisung timba akumer.

Taoba mapang New Jersey Governor inyaka alisang Chris Christie-ia Mongulbarnü nübuyim tenzükba liasü. Bodhbarnü North Dakota Governor Doug Burgum-ia iba tetoktepba nung shilem agitsü sangdong.

Küm pezü külemi inyaka arudang Pence ya Trump indang deputy tajung ka ama inyaka aru, saka US Capitol nung rongrong adokba sülen pa pila ao.

Taoba US tir election nung takok anguba kuli Congress nung Pence lenisüba kübok agütsüdang Trump-i pa dang Joe Biden-i takok anguba

melenshütsü ajungshia liasü aser pai memolungba yong tasü mait ta Trump-i aitsü.

US Capitol nung aliba Congress indang hall telungi Trump bukumertem nungpoka aitdang nisung kari Mike Pence süngzü agi alensetang ta ayimtena liasü aser Trump sülen anidaker temi pa ya ashikülaker ka amai bilemer.

Taruba küm February ita nungi state shia elections agitsü, koba dang primary elections ta ajar. Iba sülen vote timtiba angusang 2024 küm tiyonglen Republican Convention nung sangdongtsü aser iba nomination nung takok angusangi Democrat Joe Biden den November ita general election nung tokteptsü.

## China nunger warplane... (Tapak 7 nungi...)

Taiwan indang ADIZ ya par indang airspace dang kanga agi tuluba lir, koba China indang ADIZ alema aor aser mainland indanga kar densema lir.

Taiwan mitkari tensa kanga junga asadanger aser telangzüba agüja patrol planes, naval vessels aser ali nung amenoka aliba missile systems tem yokogo, ta ministry ajanga Twitter nung ashi.

Saka parnoki tayimtsü par airspace telungi aiba ya anen asü masüar jangja mashi.

United States, Philippines aser Japan lungjemer South China Sea nung mezüingbuba coastguard drills tembanger anogo ka lir iba ya ataloker. South China Sea ya ajunga amai Beijing-i par indang ama

kibur kuma jembir.

Taipei-i danga linüktem den tesendaktep yangluba mapang China mitkari Taiwan temeket nung raradang amshiba tayimtsü aser rong sepaitemi exercise balala agir.

Taiwan ya linük temeja ka ama züngshiba linüktem China-i aitsür aser iba asetkong müketa joint military exercises mesüra Western politician temi semdangba langzüa parnoki mapa agi inyaka sayur.

California nung April ita Repblcan House Speaker Kevin McCarthy aser Taiwan Tir Tsai Ing-wen senden amenba mechi Beijing-i iba asetkong mokdang ama asemnü military exercise agia liasü.

## BILEMDANGANG

"Nü kija dang süaka ochi nungibo tasetshi."